

藝文志

昔孔子之論文也僅曰辭達以是知文之工拙似不專在乎辭之豐儉也開原僻處邊陲士風質直名流碩彥之著作類多直抒胸臆暢所欲言而雕辭鏤句者蓋寡茲編所載雖其人之造詣與事之關係各有不同而要之以意運辭求能自完其說也初無哉異至於載大道傳不朽視古之立言者何如公論具在有非輯者所敢知矣志藝文

藝文

明

重修石塔寺碑記

主事 黃瓚

開原城之西南有寺曰石塔即古崇壽禪林也正統歲辛酉欽差鎮守遼東太監楊公宣左參將胡公源當祀神之期躬詣是寺見殿堂門宇悉爲風雨飄零頓興善念爰同開原備禦遼東都指揮使裴公俊僉都指揮使宋公眞王公崇等相與捐貲鳩工推致仕千戶王公銓董其事改舊規模而增新鼎盛使足爲邊城之壯觀焉若三寶佛殿大悲觀音地藏等殿山門兩廊僧房庫廳鐘鼓供器塔道諸務所費不可以少計所成不可以日限而致仕王公承事惟謹經暑冒寒務臻其美而後已迨丁卯春厥功克成內則殿堂一應莊嚴采繪煥乎金碧之交輝外則墻垣四圍黝砌包堅飭乎版築之咸固誠足爲邊城之莊觀他寺殆莫與比矣乃命予作記鐫石以垂久遠余撫其舊碑雖無全文可考其幸存而見者則崇壽禪寺四字昭然及載自唐乾

元年有僧洪理大師始創建之遺址寬宏大定三年入滅因建石塔爲大師龕此寺名之所由更也兵燹之後石塔尙存而寺就傾頽後僧淨善欲復其舊力不能致永樂己亥七月望掌遼東都司事右軍都督副都督王公眞後都指揮鄒公溶捐貲募衆亦惟致仕王公是命衆善人白守槐等敦匠重修及宣德戊申九月終畢工然尙未能復其舊也茲視舊者豈徒復之已哉聳氣象之鼎盛啓萬年之梵刹不皆在於此乎夫鎮守二公及諸屬衆捐貲以修是寺者所以廣一念好善之心也致仕王公承命不怠始終其美者所以成千載之善也良心之好善無人而或泯善事之相傳無世而或隳善心有所發則善事終有成事之善者一本於心之善則凡爲善之報安有不錫之以諸福而降之以百祥也哉况佛之靈顯揚於當時者如此有不覃福邊城而萃祥於好善之人者耶是以爲之記於時普衆捐貲雖有多寡不同而皆隨其力之厚薄亦宜在所列以彰厥後姓名各具於碑記之陰云

清

新建文廟碑記

知縣 劉超凡

自精一相傳以來木鐸一振道隆千古奚待創建殿宇然後知尊聖人耶然而天子辟雍諸侯泮宮當視學之日大昕鼓徵天子猶皮弁釋菜經筵講官儼然以先師臨之庶幾在學子弟入其廟聆其義如覩其人借曰夫子已往吾不信也開邑設於康熙三年首任何令尙率百姓廬幕於茲他未遑圖乃孜孜焉以文廟爲首務僅於縣治東南隅置草殿三楹不止明堂兩廡泮池未備卽所謂宮牆數仞者尙未暇謀及也斯時也制料初設青衿乏員何令僅於朔望謁茲草堂至春秋丁日伐鐘鼓獻帛爵皆如禮焉誠謂五方雜處剛柔緩急非禮樂無以齊之故欲民之歸於和厚也斷自學校始今余歷任二年餘躬率文武生員及夫社學子弟築垣爲藩立櫺星門及左右二坊餘地東西計十四丈南北計三十丈務使足以爲明堂兩廡地者以俟異日縣令培育人材興隆學校則譽髦斯士孰不望宮牆而興起上以咏王國之菁莪下以厚邊隅之風教豈獨增輝俎豆僅鳴辟雍之鐘鼓

也哉是爲記

重修文廟碑記

康熙二十二年

知縣 周志煥

歷觀世之盛也比戶弦歌崇儒明道必自學校始鄉學三代異名國學遞仍其號鄉學即今之郡縣學也講道明倫接洙泗之淵源續斯文於不墜養老而教射尙德而毓才無不出於斯焉典最盛矣值聖天子稽古右文躬親釋奠經筵講學博徵碩儒聖賢之道昭明於世誠唐虞三代之時也近又奉俞旨敕滇黔諸省各官創建學宮使山陬蠻瘴之區得沾聲教矧畿輔近地鑾與臨幸若開原者而文廟茅茨不翦土階湫隘豈所以尊崇先聖之意乎但斯邑建立未久前任何公金序披荆剪棘剏茅殿三楹奉祀聖賢繼任劉公超凡復立櫺星門外置左右二坊規模已備惟兩廡神牌俱未之設煥司牧是邦踰越二載心懷修葺力不能建今敬捐貲購工以瓦易茅飾聖殿而重新之置四配十哲兩廡先賢先儒神位蓋欲爲荒邑尙斯文之統以覲揚

我皇上文治之盛即瞻仰宮牆者或亦有所感發焉

重修關帝廟碑記

康熙四十四年

知縣 羅 鎰

粵稽遼志開原於古爲肅慎地於元爲開元路大明洪武始設城池其西南隅則崇壽禪寺浮屠屹然初建自唐其東北隅有元帝廟建於前明之時惟關帝廟自國朝定鼎以關東爲發祥重地畫郡邑置官守而後有之也余以丙子歲來蒞茲土每朔望至斯見其地勢閎廠規模頗具而頽垣斷瓦風雨剝落未嘗不欲更新之奈地瘠民稀力短心長遷延及今同邑文武僚屬下逮鄉耆之好義者莫不捐奉解囊鳩工庀材奔走共勦建正殿三楹左右兩廡前軒中門角門繚以周垣聖像供噐一一丹堊輝煌金碧璀璨凡向時之未有者增而擴之已有者修而整之他如鐘鼓戲樓山門斯以次第畢工而廟貌一時煥赫焉於是民人環請爲記余不能文竊思

關聖夫子忠義塞乎天地貫乎古今即山陬海澨凡有血氣莫不景仰開原地處邊

陲猶能知所崇奉如此非神之靈爽實有以保障之奚以至斯哉然而風俗之敦龐人心之慕義亦概可見矣是烏可無以記之歟廟始於康熙辛亥歲基址長二十九丈闊三十一丈僧人現真現性共奉香火顧僅數椽爾暨丁卯而廟制增美猶未備也茲則百事具舉煥然聿新爰泐貞珉俾垂不朽云

重修文廟碑記

乾隆三十三年

知縣 多隆額

竊謂開邑

聖廟建自康熙甲子迄今百有餘年棟宇損壞牆垣傾圮余於乾隆十九年蒞任茲土觸目驚心即欲重加整理奈有志未建今膺簡命復補斯邑謀及儒學飛田丁公捕廳勗旃沈公暨原任雲南文山縣太完郝公原任直隸滄州華菴郝公勸諭闔邑紳士軍民商賈人等竭力捐修悉皆樂從又賴丁儒學慨然以爲己任協同候補縣尉復旦王公擇人而董事按式以鳩工一切擘畫指授無不盡善名雖修補實同新建工已告竣用當勒石是爲序

義塚碑記

宦 玉

嘗思人莫苦於離鄉莫苦於離鄉而死尤莫苦於離鄉而死而并無地以爲葬身之所即如開原地廣人稀招聚之民來自異方者甚多年力精壯者尙可自食其力不至凍餒動念桑梓亦可旋歸故里若夫年老衰弱俯仰無資困苦饑寒奄奄待斃一旦不測棺木將安所出即有樂善好施者憐而殮之或浮寄郭外或散置荒郊日久年湮枯骨暴露過者見之情何以堪茲者陽和門外有道人姓郭名珏字無玷號淨明埜人建歸宿草庵同宦玉會齊魯人治地二十五畝十五畝爲義塚即在庵後餘者作庵中香火之資誠敬慈祥垂示久遠承事者果能兢業不違善爲繼述使落魄安然於地下遊魂逃矣於西方與初立義塚之大慈大悲欲度人如恒河沙數者又何分先後焉爰勒石以勸將來是爲之記

官設義塚碑記

訓導 劉 喆

時乾隆四十二年歲次丁酉五月乙丑朔二日丙寅恭逢聖母孝聖憲皇后升祔

欽頒恩旨內載一窮民無力塋葬無人收瘞者地方官擇地多設義塚掩埋毋使拋露欽此欽遵通議大夫開原城守尉六公十七文林郎知奉天開原縣事明公亮恭承帝命率同僚屬會集旗民選擇高阜二處名曰義塚一坐落東門外農神廟北一座落西門外鬼王廟前計地十八畝委令正藍旗防禦官元保典史雷從雲董率其事於十月旣望義塚落成旗民感戴請予爲記以垂不朽記曰昔聖有澤及枯骨之恩國風有哀此梵獨之誦陳寵埋暴骨廣漢藉以垂休曹褒葬停棺射聲於以流渥故釋氏有言與其滿地鋪金不若祇園撿骨也於是擇阜成塚計開十八畝之坵壠斲木爲棺約收百餘具之骸骨鳩工三月躋立雙塋旣卜地於西郊復鑿窆於東甸築牆禁遊牧栽木斂孤魂洵美事也於戲聖孝格天鴻慈濟世舉斯加彼實乃遍寰宇而及黃泉錫類推仁不啻起死人而月白骨游魂得所可免風雨之飄搖旅櫬即安何慮荆棘之荒蔓此屬千秋之議舉更順一邑之輿情恐日久而湮埋故鐫碑以爲記

重修祖師廟碑記

段雲峰

開邑之東北隅舊有祖師廟殿宇數楹中塑老子像左爲孫真人右爲公輸子攷之經史未有明文即乾隆十年創修碑記亦無真實考據惟邑之游於藝者每於歲時伏臘佳節誕辰特辦香而虔祀之迄今百有餘年所有山門殿宇悉就傾摧奉祀者會五行之首集八作之衆羣議公舉各盡其力之所能爲各呈其技之所應用捐貲竭力踴躍爭先所以經之營之不日成之矣今入其門閉閤昭然循其牆繚垣轟然升其殿丹雘煥然美哉輪焉美哉奐焉頗可以壯觀瞻而增形勢之勝也董其事者欲鐫諸石以垂永久而乞余爲文以記之余觀世之營情禱媚者以其能爲福田利益也以其能爲消滅災殃也遂致非其鬼而祭之妄爲意外之干求今諸工師之爲是役也志在報本以爲俎豆蒸嘗之所以視夫非其鬼而妄爲干求者其爲賢不肖何如耶余甚喜諸工師之報本追遠而有廢斯興也是爲記

重修先農廟壇碑記

張峻德

先農廟固邑之正神也想夙昔德及編氓比戶共享樂利職司稼穡隨時屢錫綏豐巍巍神功所係顧不重哉第自數十年來非無春祈之祀事而棟宇凋殘不可以嚴對越也非無秋報之祭儀而牆垣傾圯不可以肅昭格也當此舊址徒存雖前此有鄉國善士竭力重修而迄今多歷年所欲使墜者修損者益不已有甚難者哉乃自咸豐辛亥歲邑有白金者係正藍旗滿洲人滿名五十六謹奉縣尊堂諭遂會同耆老鋪商公議修理至二年壬子歲鳩工庀材共舉盛事或求助於邑或借貲於鄉一時之好善而施銀者雲集響應爰是按處以備辦費用擇人以總督事物迨秋時而工竣其正殿三間則重建其祭壇鉅制則新建也其公所暨山門等處則增建也以及係廟內一切應有者莫不盡美而盡善雖爲修補實屬新立然以之表妥侑無風雨漂搖者矣以之肅觀瞻有丹雘輝映者矣知賴厥神靈旣覃恩於萬姓而隆其廟貌更被德於千秋倘世遠年湮後有嗣而葺之者俾

興者不至或廢成者不至或敗異日之經營更倍於今日尤在會諸人所厚望也故值工已告竣特勒石以爲記

教民恒言序

康熙十七年

奉天學政

姜希轍

六諭恒言真菴魏相國所輯以牖民於善者也鄉社行之久矣今年春予奉簡書視奉天府學校甫下車開原劉令來謁謀以是書頒布講約俾山陬海澨咸識爲善之樂誠良有司意也凡民之生清濁異氣剛柔殊質淳漓異習而降衷惟一道之斯行聖人因人而設教樹鄉國之學以至黨有塾術有序猶恐其不能家諭而戶曉也使適人以木鐸徇於路從而提撕警覺之盛世所以無廢民而成善俗也今遼左舊都西扼紫關東連青海山川葱鬱靈氣所鍾宜其風俗首善而予星軺所過士滿人稀形鳩鵠而噉鴻雁絃歌之聲闕如也蓋此地自句麗以來累代用武廼者遷民新集習聞剽悍之遺未嫻文教賈生云移風易俗類非俗吏之所能爲昔者文翁守蜀而禮樂興韓子刺潮而頑梗化雖蠶叢唇海之間可以漸摩造就矧遼河東西方數千里舊時戍壘已屬田廬亟宜以是書宣揚而勸導誠未可旦夕強也同官莫不嘉劉令之舉加意撫循廣敷訓迪不特斯民還醇將禮榮之興在此日矣

修城記

知縣
明 亮

易曰王公設險以守其國險之時用大矣哉詩云王命仲山甫城彼東方是城之不可不修也明矣故溥彼韓城興實墉實壑之歌而有俶其城美申伯召伯之作倘恃陋而不備罪之大者也逸詩曰雖有絲麻無棄管蒯雖有姬姜無棄憔悴言備之不可以已也是城之修不以太平而或廢也况奉天爲發祥之地不可不壯觀瞻開原乃邊塞之區不可不嚴保障余自四十一年到任扶餘翌日閱城出其闐闐惟土阜而已環其雉堞惟棘牆而已居然培塿何須懸布而登密邇封疆自可鳴鞭而至夫乃嘆大道之行外戶而不閉大道旣隱城郭溝池以爲固此禮運所言茲於殘缺之金湯而愈以昭郅隆之景象矣迨四十三年翠華東巡特命修

理四十七年告竣遂乃仡仡言言如周禮之所謂司門掌授管鍵以啟閉國門譏出入者殆相類焉況登城而望外則營屯櫛比內則廨署棊布不愈增其雄偉矣乎故爲記以誌之

新建鐘樓記

明亮

乾隆四十七年歲次壬寅城工將竣鐘樓未修商賈旗民捐貲新建基高二丈鋸起四門閣聳兩層牕闕一邑無如起麗譙而通闐闐樹筭業而缺鎖鑰因請大塔寺銅鐘懸於其上乞余作記以示永垂余覽夫樓之巍巍乎迥出於市廛也據坤靈之正位做大紫之圜方衆山響應無遠弗周萬象森羅環窗拱列星河落於簷前鼓角驚於地底美哉輪焉美哉奐焉洵可謂肅慎之大觀矣故夫雕楹玉碣繡栢雲楣金碧輝煌旣盡丹青之巧棟宇層疊更昭臺榭之超又見鐘懸偉鏤古色斑斕鑄本先朝舊同無射茲竟移之乎然而覺王遷謝象教流行四大皆空五蘊非有昔尙捨身於羯利今豈有愛於蒲牢將見發晨昏之猛醒悲壯鏗鏘感牟尼之神鐫噌吰鞳鞳聲催五夜不僅暮折之相聞響徹重霄惟是妙音之普度以聲警衆以數紀更無量無邊釋迦檀越則此一鐘也亦猶苦海之慈航昏衢之巨燭云爾費銀三千興工五月落成之後爰記以文

修倉記

明亮

夫倉者穀藏也存救之要術儲蓄以虞災也月令曰孟冬之月命有司穿竇窖修困廩謹蓋藏務積聚乃重粟之意也詩曰我倉旣盈我庾維億美額貯之豐非待凶而頒者與自古以來有均輸有常平有義倉有社倉法制不同而總爲民計然厥口之不堅收貯之不謹則利於民者有時而害於官矣卽如前令以交代期迫誤用算丈之法致短米石獲咎侵欺又查出倉廩破敗霉爛米穀豆麥至三千有奇加罪追賠修理致令瘐死獄中又有一令亦因倉糧霉變被參革職審追嗣後交代因倉糧拖欠不知凡幾矣自余到任後視其廩間則風雨不蔽也驗其穀粟則糜爛難堪也詳報修倉而未蒙批示日夜焦思以爲陸曹之續矣幸四十三年

御史索諱興阿公按臨開邑詣倉大怒即欲提參因查詳稿未見批回乃宥余而叅上憲奉旨政修倉廩減其額貯而十二城亦賴此而詳修是百餘年之積累一旦而清除矣余憫二公之受辜又嘆一身之幸免茲於修倉告竣後而作記以爲炯戒後之君子幸留意於倉務焉可

新修社稷山川風雲雷雨各壇記

明亮

禮經考索曰或問社稷何神曰土穀之神也人非土不立非穀不生祀之所以報本反始也左傳杜預注云社實陰祗稷惟穀元師敬萬類協讚乾坤故載芟之作紀春祈也良耜之詩美秋報也則社稷之所係顧不重哉至於四境之內有山林川谷邱陵墳衍原溼能出雲爲風雨見怪物者皆曰神民之財用於是乎取辦焉非此族也不在祀典是則祀之不可闕者也詩云懷柔百神及河喬岳此言武王巡狩之所祭也是知天子祭天下名山大川而諸侯祭境內之山川則山川者不與社稷同尊乎若夫陰陽之交合上薄而爲雨下薄而爲霧風其意也雲其氣也

雷其相搏之聲也電其相擊之焰也總以出乎山川而有功於社稷者也余自到任以後所謂壇廟率皆傾圮而無存於是數載捐修至辛亥而始備東門外有先農之壇焉南門外東有社稷之壇焉西有山川風雲雷雨之壇焉且西門外又建有厲壇焉是興其利而除其害以表神道之依歸革其故而鼎其新以隆歲時之報享爲民祈福敢不加虔守土微忱用昭示後豈得以微務目之而不記也乎

勸民簡要論

明亮

余觀經史之所載律例之所垂雖有萬語千言總爲化行俗美夫善不費錢積而成寶人亦何憚而不爲也忠孝自有慎勿欺慢而背君親節義雖無慎勿卑污而虧行止酒醪宜戒勿以沉湎而即昏狂色欲宜閑勿宜姦淫而傷風化財帛宜辨勿以貪婪而昧營求氣忿宜平勿以豪強而甘爭鬪烟魔宜遠勿以鴉片而戕生全他如賭博者乃爲破敗之媒遊蕩者終入盜賊之藪又有深於忌刻習於凶頑工於唆調巧於坑陷種種惡孽歷歷招愆小則貽累身家親友訕笑大則有干法

紀官府拘提屈辱公庭生死莫能自主哀憐獄吏恩威任其所加何等人身遭此魔障斯時回首已屬噬臍即或幸逃法網難免閻裏神嗔一切災害凶危半是陰陽果報興言及此可爲寒心莫若廣積陰功多行善事以衣冠禮樂之軀務士農工商之正道藝傳家可冀榮華富貴敦龐自守何由顛沛流離則樂業安居永保妻孥之完聚作德修福堪爲後嗣之儀型以著聲名以光門閭勉旃勿怠猗與休哉

養蜂者說

明亮

余因公赴東山見養蜂之家擇山陽空心老樹鋸而存其半封其頂而穴其腹以爲養蜂窟者不下二三十株有蜂老丈焉昂背魁肩高步闊視似有道之人也居而問之答曰蜂雖微物性實靈也王者不出有君臣之禮焉螫者無赦有刑罰之義焉一日兩出而聚鳴號爲排衙有威儀之制焉採無所得而經宿不敢歸房有服役之忠焉至於分巢必合黃道能協天時月令之宜而釀蜜獨具巧思大爲和

藥調餽之助蔗飴雖美不及卉醴之功多也力田有秋未若匭豬之利普也且享其利而留其餘厚其儲而孳其族是我爲仁宇而蜂獲樂郊吾一家數臣之衣食皆賴於此又豈沾沾焉誇十七桶於洪武之前乎語若穿珠雋如炙輦旁有老役執挺首肯者久之余亦正襟危坐命吏折簡而書之

諭民掩埋骸骨

明亮

照得開原所屬旗民村屯不下數百而每村屯附近必有浮厝棺木大處多者十餘小處少者亦五六蓋人死以入土爲安而生者以辦喪爲急奈何以相親之情忽忍而爲相棄之舉遂使孤棺久露致風雨之侵蝕而怨鬼無依爲地方之冥害甚至傷心道路穢氣薰聞何等人身遭茲狼藉以致精氣遊魂之擾上干陰陽天地之和凡水旱不調癘疫相傳者未必不由乎此也而橐葬之家又豈能昌盛乎自示以後務令擇吉速葬而守堡鄉保等亦當實力稽察未可以數戶之无情而爲千家之隱累嗟乎掩骼埋胔皆仁人之事務民敬鬼本智者之爲修善獲福豈

非美事乎凜之特論

秘譜書屋宦銘

知縣 明 亮

遠陶聖世少齒鄉鬻出宰百里一命之榮河陽花盛單父琴鳴官小權重治國如烹 居官

研覈臧否夙夜屏營稱物平施不將不迎踉跂爲義蹙躓爲仁邪徑賊田惡政傷民 存心

發姦摘伏竦善抑惡鍛練之吏持心近薄徽纏叢棘菲履赭衣歸獄不解茲謂追非 刑名

既執刑柄復秉利權貪欲無藝攘奪矯虔已奉穀租又出稟稅暴斂橫征施及氓隸 錢穀

羽觴醕醑芳饌奇珍雕牆峻宇好爵是縻淫酗營肆酣歌墟邸甘酒嗜音伊于胡底 戒酒

織腰跨軀嬌語嚶聲如靜女喉若雛鶯管絃嘔啞蘭麝氤氳色授魂與意何云

云 遠色

脂膏莫潤圭玉無瑕廉約奉公勤儉成家侵牟萬民漁奪百姓賄賂公行不甯不令 辨財

不受齧芥獨持風裁偃蹇驕敖如霆如雷平心靜氣增美釋回一言僨事嗟何及哉 懲忿

用財欲泰從諫如流闕疑闕殆寡悔寡尤願學魯山願學太邱布政優優百祿是求 制行

高懷霽月雅量春風束溼操切蕩滌一空跽跼爲詩諛諛爲文公餘集古以勗天君 消遣

重修慶雲橋碑記

王廷才

事有可爲則爲之非爲名也顧創作於前尤貴繼成於後隨時與地俾得有所考

證而興舉之則叙次其年月表彰其事實亦有不可闕略者如邑之西郭慶雲門外池水環衛其平時騎而行者波及馬腹輿而過者渡若扁舟遇旱乾則坎陷沮洳既有濡足之患遇淋潦則洪濤巨浪更有滅頂之凶且附近城闕爲閭邑出入之總徑來往之通衢日夜奔集絡繹不絕無徒杠輿梁以濟之未有不病涉者都人士因捐貲建橋於其上名曰慶雲橋厥後有廢必興屢經修葺所以表矢直便行旅者蓋已歷有年所矣溯自道光元年居人捐募重修載在碑誌距今三十餘年橋座復見傾圮欲有重修之舉第工程較鉅非密邇居民所能任余因謀諸舖商皆踴躍樂從一切鳩工庀材皆舖商諸公始終其事並遠近官商士庶樂善與同各捐己貲以勸盛舉橋座舊用甄木今則易以條石庶堅固寬平可期永久是役也不請公帑不留私累數越月而工遂竣徒步者無褰裳之苦輿馬者無覆轍之虞且於是年秋適逢大水西門外人民廬舍多被湮沒僅餘墩阜而居者數十家所有避水男女皆賴此橋普渡得免沉溺則斯橋之成爲功豈淺鮮哉伏願後

之人存利人濟物之思體善作善成之義後之繼成於今亦猶今之繼成於昔俾斯橋有基而勿壞是所深望也夫

求道說

良弼

今夫履巉巖之險而採玉於山條焉得之未嘗不以爲喜也冒風濤之危而採珠於海果然獲之未嘗不覺其快也若玉不於山而得之懷抱之內珠不於海而獲諸掌握之中其近且易如此爲幸更何如耶道之可貴也無異於珍寶其具於心不啻玉之在懷抱珠之在掌握也返而求之不出方寸而愚者忽然方且鑽妍乎簡編之內馳驚於事務之間其致功也愈繁其去道也愈遠何弗思之甚也

太虛遊

良弼

龍漢初劫安期生與白石生御風而行遊於太虛俯視下土見夫八紘之內紛紛籍籍仕者農者工者賈者爲師儒者爲將卒者與夫百家雜技各以其術鳴者總之所求不離二者名與利而已矣甚有富愈圖貲厚貴益謀位高者無厭之常情

猶可說也更有觸目疚心不堪指數者如污廉爲貪報恩以怨婦子而忤親長盜賊而憎主人邪曲誣正藉訟庭以生財官吏容姦錮善士以索賂安期生喟然而嘆謂白石生曰是豈有不可已者乎衆無庶勞勞胡爲若是不情也白石生曰世固有不獲已者託業而必軌於正吾無責焉耳若夫可已不已悖理妄作是謂昧性昧則失其本真漸變而不可知矣子不見夫昆蟲與禽鳥乎鷹化爲鳩田鼠化爲鴛雀入大水爲蜃甚至變而又變化而又化如蠶化爲蛾蛾生子復化蠶當其未化固弗識其性也及其屢變如隔數世更不悟其本源矣人亦有之疢毒之性化蛇化蟒往籍所載不一而足機械旣深良心盡失輾轉異類罪由自取烏足惜哉今吾與子俯仰乎寥廓之墟但葆此心湛然不昧而已彼下士之膠擾者非吾與子之責也又何嘆焉

重修節孝祠碑記

楊光鑑

原夫節孝祠之立於斯也始於明經王芝亭前輩至如何卜地如何創修載之前碑詳矣然其因陋就簡經時既久遂至剝落不堪春秋致祭無容樽俎之地者蓋有年矣祠之所入僅以補苴罅陋董事者復袖手不前幾幾乎一敗塗地無有過而問者鑑也覩此殘缺雖有重修之志而綿力無多恐不克荷此鉅任急商之孝廉聯公陞茂才楊公景和重九職任公德成咸以爲然此數人者皆節孝後裔義不容辭者也合辭呈請縣奠祥公蒙批准如所請而重修之志定矣擬以正祠五楹取其恢廓有容也中截花垣一條取其內外有別也陪房五間中爲祠門儲其賃直以備歲修也甘井一泓別闢一隅便於汲綆並嚴出入也至地基長展數尺牌位統歸一律又稟請在案遵式而爲之者也昔也禮制微具今也規模整齊嗚呼完矣雖然一木焉能支厦集腋乃可成裘始而重九職劉公繼賢倡捐金二百繼而耆民杜公立林亦捐金一百其次陸續助資五百餘金胥附貢生裴公殿芳與吾諸人始終勸之者也夫事特患不爲耳苟有其志事可竟成當夫祠之未重修也旣無可籌之款又無可勸之工局中作局外之觀古今同慨吾諸人謀有同

心事無掣肘堵築於艱難之會興作於炎涼之時自始事至告成四閱月而工畢噫何其速也或者節孝有神默爲感通乎抑亦工歸實用衆志成城乎書之於石以爲後之繼修者鑒

重修奎星樓碑記

趙薌生

考太史公天官書北斗七星第一星至第四星爲魁第五星至第七星爲杓合而爲斗是魁乃付乎北斗者也又云杓携龍角魁枕參首魁斗戴匡六星曰文昌宮然則今之所謂魁星者其即此歟惟設樓塑像之供經史無載大要以其地近文星光分天府云耳况我朝法天立極景運獨隆仰觀俯察創制俱有精意胥郡縣而立學宮莫不設魁樓於東南城隅向占巽地位列丙方取木火文明之義實學校風水所關士之掇科名拾青紫者咸於斯卜休徽焉是樓之設又烏可忽諸查開原縣志魁星樓建於康熙年間惜當時碑碣無存未能詳其始末迨乾隆四十七年重修之役實賴蒞斯土者明公諱亮以名孝廉作宰斯邑有心文教起而新

之嗣嘉慶四年秉鐸者胡公又加修葺兩次均有碑碣可稽然去今已將百年矣其間之歷經修補概難詳述陡於光緒十二年冬夜遭回祿樓像焚如匾額俱燬摧殘者三易寒暑同人屢欲興修絀於經費延及十五年春二月實任開原縣知縣祥公惻然憫之首捐廉俸糾集邑紳廣爲勸募自五月初四日經始至八月初四日告成經營三月之久花費一萬有奇此次樓形仿他城六抹亭式視舊稍爲改觀倘由此人文鵲起科第蟬聯不誠於斯樓有輝耀哉是役也督理監修者張斗南一肩任之總辦捐項者趙品卿封君裴香閣先生高紫垣歲貢及優附生高秋浦李華春與國學韓百昌也余亦奔走從事得附諸君子之後有餘欣焉樓成屬余爲文余辭不獲爰考崖略勒諸貞珉以冀夫有志興起者是爲記

開原縣關岳廟碑

章啟槐

慨自萬方多難聞鼙鼓以增思千載云遙緬英雄而起敬世道日微抱忠義者幾輩時艱孔亟能匡濟者何人夢寐以求馨香而祝歎逝者之不作望豪傑之再生

是宜右武並表崇忠敬維

關壯穆候

岳忠武王河獄英靈乾坤正氣忠誠激於金石武烈炳於旗常英風亮節同耀寰區大義孤忠咸深遺愛洵爲師干之圭臬足示民族之楷模

侯則翌贊昭烈鎮守荊州心存劉漢志在春秋圍解白馬已佩用兵之神會責烏林復見仗義之正威震華夏聲奪孫曹絕倫逸羣馬孟起詎能望其項背風流文雅張桓候更難擬其襟懷後之過遺壘者歎爲奇才讀蜀史者稱曰義士

王則智勇冠軍忠貞蓋世兵略天授義憤之歸特其處境尤難遂致殊勳未竟內爲羣小所讒外有強寇之偪誓掃胡氛渡河之聲尙壯難清君側報國之志莫辭恨北戎之未滅嗟南渡而偏安奸黨快心孤臣泣血願既違乎痛飲事遂至於捐軀十二金牌斷送河山一統三字冤獄長使今古同哀追述前徽咸懷明德論勳業則山川並壽同期恢復中原論行誼則忠孝兼全不僅頡頑國士大節相符有

功必祀民國肇造特定合祀之章奕世有靈允爲萬家之佛

啓槐

忝守斯邦恭逢

盛典用特率同警察所長全璞修建廟宇供奉

神靈聚異代之精忠一堂共處增上京之盛事萬古咸瞻是其忠能報國所以德必有鄰際春秋而致祭志事久欽肅俎豆以明裡心源如接願巖疆之坐鎮廟貌長留伊精爽之式憑民生託庇從此旌旗顯赫御雲車風馬以偕來袍澤仰觀激古誼忠肝而興起丹修青飾永期廟宇不刊山高水長亦等祠堂爲記

開原縣義勇祠記

章啟槐

開原巖邑也外蒙部落控其北南滿鐵道枕其南復與吉林疆土毗連地處極邊爲遼瀋北門之管形勢既極險要交通復稱便利而萑苻遂較他縣爲獨多以其利於出沒逋逃也其地夙號難治守土者恒苦之定制縣境設有警團劃界以守警察之區四保衛團之區七巡警團丁凡九百餘名各有長官若干員統率之均司保民緝匪之事其人率多土著所受官家餉糈甚微蓋半以保衛鄉里爲義務

者故一聞告警銜命即行痛擊窮追不遺餘力每屆青紗幃起鬚匪尤恣橫嘯聚成羣盛者數達一二百分幫擾害劫擄頻仍警團於此時期咸不安寢饋四出剿捕嘗日出而相率以征星夜而不得休息其精壯者往往衝鋒陷陣前仆後繼槍林彈雨不稍反顧嗚呼自有警團以來死事者多矣或飲彈陣亡於當場或負創殞命於事後近三四年間尤復項相望踵相接時聞私祭夜泣之聲天下之至慘也其情可哀其志可敬其事又可歌可泣啓槐以謂作人處事當以血性義氣爲要素伊古忠臣義士孝子烈婦其人格完全事績優美流芳史冊傳述後世者無非此四字所造成善夫李文忠公之言曰大丈夫生世血性義氣不可一日磨滅否則入魔道矣治兵尤宜注重於此義爲主體勇次之必其人有血性養氣而後其勇趨於軌道始可用以集事即非勇者亦能奮勵殺敵致果夫好生惡死人之恒情以警團月得區區之餉糈或尙不足以爲事蓄之資苟非禦患捍災保衛鄉里大義所在職責攸歸孰肯以血肉之軀體餉無情之槍彈彼匪徒冒險行劫奮

身拒敵莫不强悍異常臨刑時亦多神色不變或長嘯高歌其人何嘗不勇特其勇而不義則適足爲害人殺身之具所謂已入魔道者矣啟槐守此有年凡警團殉難者皆專案請卹並及其遺族惟祀典闕然不足以慰幽潛而昭激勸爰將舊銀佛寺改爲義勇祠命警察所長全璞董其事取有案可稽者依次造具神主歲時致祭以妥忠魂藉塞吾悲修建經費均出自捐募並將輸捐姓名勒於石以彰好義工既竣羸爲記其梗概又因推論兵家要尙之所在云

上開原縣監督保公輔宸書

光緒三十三年三月

徐文華

爲任差伊始謹擬進行方針懇 恩鑒核飭遵事竊以我開創辦學堂及今兩閱冰霜乃調查城鄉各校寥落仍若晨星豈眞風氣難開歟抑亦掌教育者無術指南盲行於五里霧中爾華當奉委以來自度蚊負難勝蠡窺易悞晝夜焦思略獲端緒試熟數之於前乞詳擇焉查本邑學欸歲人祇五萬吊歲出竟達十萬吊於此而言興學誠爲無米炊矣然底款五萬之息圍荒五方之租均可價增倍蓰而

出口之實糧以及船道倉地各捐倘能派員經收無一不大增進款况期糧捐局每糧百石抽附加捐錢五吊經陶前任稟准抽提一吊撥歸學費又車捐雖改統捐經前任楊公稟准督憲暫給一千元此二項批准之巨款實能敷常年之用惟財政局尙未議覆而楊公又值交卸遂致擱淺若監督據情申詳仰邀允許則學款源源而來矣然此城內官立各校之款也至四鄉公立各校其款向出於地捐查本邑旗民各地每日抽捐一角以十枚計僅以四枚歸學堂偏枯莫甚焉擬請與警務平均增爲半角且以二枚歸各屯以三枚歸各區俾胥能獨立一校必其屯之不立學堂者乃舉學款全數提歸本區庶乎利益均霑而鄉學不至患貧矣然而新築萬間廣廈托庇四境生徒即令百方羅掘財力依然不給故校舍非借用不可查本邑各村均有祠廟中附會房數間擬請飭知各路區學董凡鄉學無堂舍者准其佔用違者以阻撓學務論如此雷厲風行將不費一錢而四境之講堂寢室雲連霧合矣惟城內師範傳習所借用儒學衙門學生尙無宿舍擬在

後院添修正房五間第一兩等小學借用龍岡書院堂舍均不敷用擬在後院添正房五間前院添東西廂房各三間總計洋瓦十六間共估價洋三千二百元擬由原存學款動用若擬新改之第二小學堂借用財神廟班次不多暫不添建至東北西南擬借各寺院稍加修葺便可開班悉無用大興土水也經費充矣校舍備矣學堂可以林立乎未也科舉初停學堂新設舊人才既不適用新人才又未產出即或多辦學堂亦擲金錢於虛牝壯堂舍之外觀而已於人才之教育固渺乎不相涉也雖本邑在奉傳習者已有十數人本城師範傳習生客冬畢業三十人亦均可作師資惟本邑五百村屯需用教材至夥乃祇有此數十人故公學私塾多係舊派主教即間有傳習生而一傳衆咻亦多爲其同化力所化學務何由進步然取嚴格主意全行撤換則又向何處聘大多數教習以應急需華擬降格以求而作通融之政策焉計四鄉私塾約四五百處塾師亦即應有此數擬令來城甄別擇其舊學饒有根柢稍通新學者准充初等教習嚴加淘汰亦須取錄

百人其文理清通而缺欠新知識者擬令於暑假期間來城研究約可得五六十人第二班傳習生程度頗優雖肄業一學期未滿一年畢業之限現爲需人起見擬於暑假之後先行派充教習隨即添招第三級傳習生補足原額至明年春初將第二班生調回補習而以第三班生接充其職如此教學相資輪流更代總計數項約可得教習二百有奇再有不足稍行取材異地庶無乏才之歎矣然此猶其可緩者耳華試言本邑學務之刻不容緩者治國者各安分土則興用兵者各守汎地則勝辦學亦何莫不然本邑興學有年而茫無頭緒良由學區之未畫耳擬遵學憲頒發新章就四鄉區域畫爲東南及東西南北五路每路各畫四區查東與東南二路長約二三百里然山川旁午村落零丁故難多畫西路方六十里廣袤不及二路而地勢平坦居民稠密故亦照畫北路南北不及二十里狹處祇四五里東西雖寬不足四學區之數擬割東西二路鄰城一帶附入該路畫歸一律南路寬六十里長四十里而西河東山之間居民麇集故亦可畫爲等數且各

區雖準於地勢之廣狹民居之疎密然究以地捐湊足三千日者爲限凡以便於學款之支配也第教化之興由近及遠城中如未風靡鄉下何能草偃擬先由城中畫起以鼓樓爲中心點以四街爲經緯線分爲東南東北西南西北四區庶幾建設學堂有一定之地點矣區域既分非派專員經理事成則功可爭事敗則過可諉何進行之有查本邑幅員遼闊祇於城中設勸學員二人以之調查四鄉每歲難巡一周且轉瞬即逝猶如傳舍奚暇勸導無惑乎日言興學而學未大興也現擬每路公舉學董一員直接監督專司一路之學務各區舉區董一員奉學董指導專司一區之學務城中勸學所既以勸學爲名乃總董而外會計四人稽查三人勸學祇二人名實既不相符責任亦不平等擬令一人主會計一人司文牘餘四人除抽查五路學務外各任城內一區勸學之責且每屆學期無論城鄉辦學人員總以建設之多寡爲成績之殿最擬由總董釐定等差呈請監督分別獎懲惟每區學校有增加者即爲及格有解散者方爲劣等總董不得上下其手也

至稽查之三人^華與韓鍾玘張四維各居其一現在^華已派充總董韓張二君學問淵博早充教職近將兼充研究會長礙難再兼他職應將稽查名目刪除稍節繁複職務既因區域而分學堂即應隨之而設亦擬先由城中試辦查本城祇有傳習所一處同在東南一區他區就學不便擬將財神廟私立小學改爲官立第二添招學生以便西北一區之學齡至該區向設官話字母學堂教員久出不歸該校已同虛設擬請停辦而以其款擴充第二小學東北有清真小學但係回民自立款項不足勢難經久擬將該族糧地二捐截留爲該校經費俾可永久支持惟該校不收外教人外教人亦無肯入該校者該區學生未免向隅擬在藥王廟添設初等小學一處俾有所歸西南無學堂則擬在大搭寺添設若五路各屯則責成區學各董要以教育普及爲目的否則以溺職論此進行之大較也如蒙允准施行當再詳呈細目是否有當理合呈請
監督鑒核飭遵^華草茅下士罔識機宜臨穎怵惶不勝鵠立待命之至

報告奉天教育總會書

徐文華

開原教育分會爲報告事^{敝會}於宣統二年二月案准

總會咨開本年通常會中議准各分會組織研究會凡教育之應興應革事宜均許會議公決仍准照辦呈報等因准此相應依法招集會員開會三日賡續研究總計議決事項一十有三試爲總會縷析陳之

一辦學事權宜謀畫一也本城官立學堂共五處均由勸學所經理頃因聯合會開議准男女兩師範歸該所至兩等小學一概附屬董事會舉所中辦學之權剝奪殆盡以致勸學員長辭差而董事會又不能接管不設法維持學堂將瓦解矣查勸學所爲學務總機關載在部章若復准董事會參預將來報表查學在在需人徒增大宗經費而學務且多紛擾若謂該所辦理不善則當設法整頓或即取消必二者兼存則政出多門衝突在所不免矣
一各屯村正宜用士人也本邑村正多兼學董凡教員之去留學生之進退皆能

隱爲主持甚或顯予干涉而充斯役者多係土豪地痞目不識丁與教習清濁異流故時生齟齬鄉學之多故半由於此查塾師之被淘汰者因無噉飯地每暗中與學校爲難若用爲村正則飯碗主意既能達到目的而又斯文一脉當與教習水乳交融相助爲理蓋其人識字尙多文義或通凡學堂一切報表等事皆可補助教習之所不及且教習更代之際學生成績之優劣學堂款項之盈絀時多輻輳若以本屯士人充村正則帳目自能經理表冊自能保存利益良非淺鮮或謂士人柔懦凡催捐籌款等事深恐不勝其任不知催捐各役皆受村正指揮苟用人得當又何慮人民之抗捐耶

一男子師範學校宜加整頓也夫教育之良否在乎教員而教員之良否又在教員養成所之教員蓋任教員者不貴有自己研究學理之技能而貴有教授他人之技能而教員養成所之教員非特貴有教授他人之技能且貴有教授他人有教授之技能本邑立師範養成所數載於茲而收效較少者其中有缺點焉一補

習師範班程度太低時間太促此後宜擇學問優長之人勿使僅識之無及雜色人等濫竽其中一鄉學均係單級非諳單級教授不易奏功此後宜添單級教授法以單級師範畢業生任之一實地練習爲師範之特點此後宜設附屬小學完全單級各一班以備練習一師範不熟悉兒童之性質則教育不盡合宜此後宜添聘師範畢業生曾充小學教習一二年者借資整頓庶師資養成而教育可收良結果矣

一女學高等宜改師範也本邑女學發達而教材缺少僅有女師範一班畢業且在四年之後需才孔殷河清難俟識者譏焉必添簡易師範一班一二年畢業乃可救然眉之急查該校高等一班年齡程度不齊教授管理實難得力急宜擴充學舍擇年長學優之女生擢升師範其年幼者留在本級肄業再提升初等學優之女生補足高等班額而初等班則添招女生補之如此則僅添師範一班而三班年齡程度均免參差女學且無乏才之歎矣

一小學校長須有進退教員之權也夫教員不一致則學堂萬難起色而一校之中良莠雜聚新舊交訐非有權以制之則校長欲東而教員欲西無論薰蕕之不同器也卽令臭味相同而意見且不免參差教授管理何由統一惟能制其進退則不慮此或曰校長有權保無流弊乎不知校長負全校之責任果有流弊則罪有專歸人非至愚熟肯以援引匪人自速官謗乎所謂請予校長之權者職此故也

一教員宜久任而定賞罰也賞罰明事乃成天下事皆然教育亦何莫不然苟彰瘡不施善惡一是則善不知勸惡不知懲人亦何樂於出力哉雖義務年滿有獎勵省縣視學有報告是亦賞罰也之一途竊謂是皆不足資勸勉也何則視學將到各校早有所聞灑掃堂舍嚴訓兒童預備教授即平時極惰之教員亦能支持一二日况視學又不能密察暗訪真偽奚知卽令真情已得考語已加幾曾見學憲據報告爲褒貶而本地據以定取舍哉欲行賞罰必須久於其任小學教員以

五年爲限無大故不准更動且教員之優劣以學生畢業之程度爲律優者加以異常勞績劣者按成減其薪金則教員焉有不盡力者哉

一教授初等國文宜詳悉字性也夫文者積字而成者也不明字性胡從造句不能造句奚由成文故教初等小學生在辨字性先授實字如名詞代名詞動詞狀詞介詞是然宜先授獨體字以再遇二字合成者有所觸發也次虛字如連詞助詞是小兒理想直捷不利用虛字此時但宜告以大要不必逐字詳求以免徒勞字性既辨可教以積字如牛字之上冠以黃黑下綴以大小是也久之乃教以聯句如主客二名詞間加以動詞爲主人送客則二名詞成句矣聯成一句之後再教以二句三句相聯如一句因二句果或二句因一句果皆是也此時宜注重連詞助詞以反正開合均在諸虛字之關合也句法至此終乎未也能聯數句成文而不辨雅俗不曉伸縮非文也教習應編成俗話令學生繹爲文話或舉成文之話令學生翻成俗話或造長句而令縮短或造短句而令伸長久而久之自然言

文一致斐然成章矣

一高小國文仍以造句爲權輿也夫高小學生多由初等畢業似能造句矣而正不然前於招考學生時見有累牘連篇不能成句者矣故仍宜先從句法開始但應取焉氏文通等書擇要而詳說之不必如教初等之淺率也迨文從字順然後教以筆路如起承轉合及抑揚頓挫是也惟講筆路時須取學生講習之文任舉一筆以爲榜樣學生方能得力若憑空結撰議論雖高隔膜不入也至句法筆路略識門徑然後授以謀篇命意諸法學生胸有成竹即在中才亦能獨抒偉論一綫穿成矣不然於識字無多各生語以意到筆隨即令舌敝脣焦終茫然不解爲何故此秉鐸者不可不知也

一教授各科宜知用意所在也夫出門無一定之方針則南轅北轍終無登峯造極之一日教授各項科學若無一定宗旨將如游騎無歸萬難就我範圍擬自今凡教授學科當體認各科之用意所在且著眼今日之國勢民風講求實益庶學

生趨向有定不至誤入歧途矣

一各科互相聯絡以資練習也查部章規定講授之時間多溫習之時間少無惑乎兒童之強半遺忘也其實修身皆經史之要義歷史多地理之事實圖畫亦格致之模型若授修身以經史爲證授歷史以地理爲憑授格致以圖畫爲副則講授此課即□習彼課庶足引起兒童之舊觀念而各項科學無不印於腦筋矣說者必諉於部頒課本教習無紛更之權兩科雖一事其如不能同日講授何不知教習苟擔任二門以上皆可自爲聯絡脫有先後則先授此課預爲提示彼課後授此課又爲追溯彼課雖不同時並授而互相印證無害於聯絡也

一小學之兒童以訓練爲管理也蓋訓練者誘掖獎勵引兒童於道德管理者以成法強制兒童俾不犯乎道德也若管理過拘俾兒童拘謹性成有若處子於尙武之教育不太相悖繆乎故教育原理貴訓練不貴管理恐養成兒童之奴隸性也本邑各校嚴者或施夏楚寬者又一切放任均非正軌也擬令教師詳察生徒

所能之事善於勸誘使知有自然結果之關係又當以經驗爲訓練或有不足則當本身作則如欲以信實訓練生徒則凡已之一切言行皆出於誠意生徒不信實之處即詳加訓誡萬勿等閒視之漸染既久則生徒自不作僞勝於撻伐多矣一同等之學生定期會考也凡事不經比較則美惡之真不出本邑學堂成績優美者固不能無而陋劣不堪者亦所不免非會同考試則優者之巧無所用劣者之拙有所藏學業之退化其又誰尤擬仿照省城觀摩會章程於年暑假之前定期會考以資比較庶因循敷衍者亦知優絀立判而熱心教育矣

一鄉間識字學塾宜於冬季開課也簡易識字爲預備立憲之要務本邑僅城中創設鄉間則置若罔聞豈盡員紳不肯出力抑亦有絕大之阻力爲辦學諸人所不可強迫者也查本邑鄉民多係業農春耕夏耘秋穫實無一刻餘閒責以入塾心有餘而力實不足若俟三冬農隙之時開塾授課夜間二點鐘或晝間加授二點鐘則一日可授二日之課將農業無荒而教育不難普及矣

以上各項皆就本地情形切實研究而得是否有當理合呈請總會鑒核施行

孤家子造舟記

徐文華

遼爲滿洲巨浸瀕河者懼及溺焉孤家子居奉天屬縣開原城西址於河東前清末葉距水而可七八里民國紀元河東徙逼近里門奪民居二十餘戶村人之田園廬墓隔在河西者難僂指數故亂流而渡者日恒數十起第岸闊水深非得舟楫不能越河一步居民憂之且本邑西通法庫南達奉天均以此水爲要津而本屯又適當孔道春夏之交車馬行人每臨河而返張雲亭吳精一二君惻然憫之倡議釀資造舟以便行旅顧工程浩大一木難支呼將伯於劉君香閣劉君爲請公款又代募捐資事乃集張吳二君遂於民國六年四月鳩工庀材特造槽舟一面閱月而藏事擇日下水行人便之斯役也募集巨款者固劉君香閣然始終奔走厥事以底於成者張君雲亭吳君精一也村人感三人高義將書其事於石爲繼起者勸問序與余余以事關公益可以昭示來茲爰爲之記其崖略以告諸渡

遼者

上奉天省議會書

徐文華

爲請議事竊維八旗學校之經費向由官地抽收自民國二年丈放官地學費連帶開除旗校有瓦解之虞幸 貴會曾議決以五厘地價撥歸旗校遂又有瓦合之望不幸貴會停辦旗兵肆意要求竟將五厘全歸生計以致各城旗校無計瓦全校董不忍作墮甑之不顧百方羅掘支撐數年然不居建瓴之勢漸臻瓦裂之期久擬據情上請又因民權未復戴盆無從望天今聞貴會復行接辦仍准人民請願私計覆盆可揭五厘原案漸可規復敢以七項理由進側聞 今大總統就職首頒明令凡學校之經費不准移作他用細繹他用二字乃概括一切正用公用而言至私人之用度更宜懸爲厲禁矣今以公共學款移作旗兵私之生計違背功令此其一 又聞凡議決之案非經會議否認無論何人不許更改所以尊立法而重民權也今乘議會中斷之際推翻議案殉小私而違大公此其二漢唐強

而軍士通經日俄勝而歸功小學凡以教育爲強國之本也我東省介居日俄之間鯨吞蠶食時有所聞凡我五族人民宜如何提倡教育以奠國基乃據就近調查兒童受學者尙不及十之四五強國之謂何耶及此實行強迫極力擴充小學猶恐不能普及若將此成立數年卓著成績之旗校不與維持國際前途何堪設想此其三以大同言之共和建設五族一家似無恢復旗校之必要然一家未有不平等者故滿蒙之不得異於漢回藏猶回漢藏之不得異於滿蒙也查奉天有僧立小學是佛教之藏族有學校矣各縣有回族之清真學校我開邑回族學校之經費除截留本族畝捐外又由地方稅補助他族皆有旗族獨無是旗族不惟難齒漢人且遠遜回藏矣不平孰甚焉况旗校自共和以來早已五族並收化除畛域未嘗背大同也說者必謂各族學校皆由本族籌款然此五厘學費實由旗兵應領生計內特行抽提原係以本族之款興本族之學與他族事同一體此其四持敷衍了事之說必謂生計已發議復五厘手續繁難乃竊查各城官地現多

未放其已放者地價尙未收完若准留其尾欠抵補學費敢保綽有餘裕況生計發到各旗其經手官兵等習慣剋叩冒銷有握欸不發者有發放而不實不盡者倘能提回但問各旗執事一二人得款直探囊耳不甯惟是各城旗署均有官房原係動用兵餉購地建築確屬旗人公產現在無人主管由各旗官兵等食租居住然皆取消極主意有破壞無建設邇來已多頽圯三五年後一片瓦礫耳倘因現存地價不足五厘之數將此項官房撥歸旗校亦足抵五厘之虧此其五存袒護旗兵之意或謂兵餉已撤生計維艱得此些須尙難過度若再抽提五厘恐有凍餒之憂不知東者旗兵半能自食其力又或家係素封非若京旗之游手坐食每日不謀一飽也且生計一項每兵約得百元所提之五厘約四五元耳九牛去一毛與生活固無傷也即令羣起反抗尙宜以敗壞公益極端懲處況其出名呈請者乃少數人之私見非多數人之公心校董戚族多有應領生計者每與接談未聞以學費爲非且有謂旗兵等假名生計會實爲開銷地步者旗族心理略見

一斑此其六持冷靜態度者必謂旗校大半改組或由地方稅補助無需五釐也不知共和國須人人具有普通知識故學校常厭其少學款不厭其多即令款有羨餘猶當作擴充之計況自民國二年以後各城旗校大都苟延殘喘不再籌款漸乏生機即如我開旗校現雖存在然名稱已改款項已虧教席僅支半薪學生多加自費而房舍坍塌滲漏無力補修誰謂不需款乎及今指撥巨款尙可起痿疾而復真元再延數年必將一蹶不振此其七以上所言自知管窺之見清議羞稱顧念共和時代言論自由若知之一不敢言言之不敢盡棄人權而廢天職辜負國民一分子矣再四思維惟有謹獻芻言仰邀葑采是否有當伏冀 貴會公決恢復五釐前案咨請 省長轉飭各縣通行則教育前途幸甚此請 奉天省議會公鑒

請籌青糧補助巡警議案

王毓琪

竊開邑自劃分五路以來巡警學堂紛紛辦起賴我 憲台提倡之力亦既新政

施行矣然上下有偏枯之弊公私無聯絡之方猶可慮也夫各鄉村正即各鄉辦事之要人從前操辦會事看守禾田年終時統計村中費用按地均攤名曰青糧今警學成立各村農家既每日地每月擔負地捐洋一角是每年農戶所攤已變爲警學經費再多攤派勢難承認因之各村村正有奔走終年無處籌欸受其虧累者有把持會事別生枝節任意苛派者推其致弊之源皆以無一定酬報使之然耳乃一觀官府之責成村正也學務未辦曰惟村正是問警捐未齊曰惟村正是問責任如斯而不籌以相當之利益一任懦弱者枵腹充公欲辭不得貪橫者藉端滋擾自飽私囊何權利義務之不均也尤足患者巡警業有局所各鄉農戶皆恃防賊有人不復存自爲防守之計偶值凶荒不靖雖有再倡團練者農民憚於費錢亦將以警局已立爲藉辭而不肯首先操辦在警局則勢難兼顧斷不能以數十人之衆舉所轄村落盡保其無虞此非有巡警之弊乃專恃巡警之弊也擬請於警學畝捐以外每日地每月抽紅糧七合一一年共抽紅糧八升四合而

籌辦西路模範小學堂案

王毓琪

竊自西路創辦學務經本邑士紳舉紳爲西路學董自慚識淺學疏難肩重任然事關義務亦不敢不効馳驅爰於七月十六日偕同各區區董到處勸導使之設立學堂乃各鄉之未立學堂者皆以未諳學務無所取法爲辭即其已立學堂之處教授管理亦皆未能合法因思地居邊塞民智未開見聞僻陋無怪其然而欲於不易勸辦之中設一廣爲勸辦之法則非爲各鄉立一模範既無以動觀感尤無以示率從蓋欲合多數之心思材力使進於文明必先定一方之規矩準繩首爲之表率也遂與各區董等公議在西路適中之地慶雲堡立模範學堂一所招

高初等學生二班每班四十人擬聘北洋簡易師範最優等畢業生劉義陳仲篋暨奉天警務畢業生劉濟爲教習其經費由西路各鄉學堂教員年暑假薪水勸作義務就西路村落計之約能立學堂四十餘處每年可得款一千六百餘元擲節設施尙能敷用已函商西路各教員無不贊成此舉至開辦費一項紳願自爲擔任人民不另增擔負而集腋自可成裘學校雖粗具規模而造車咸知合轍一事而兩有裨益莫此爲便除所需經費詳細繕單呈閱外理合將籌辦西路模範學堂大概情形另文呈請 監督案下核示施行

光緒三十二年十一月上

榴城游行記

王毓琪

開原古景有榴城者東行大路之所必經也余每讀舊志未嘗不心嚮往之欲直造其地以快心目庚戌春余以查學至古城子詢之土人榴城在其北喜夙所欣羨者適得之目前乃約村長王君銘閣教習王君雪樵同一游行焉初出里門見

有道在東直而坦意爲赴榴城之正路詢之果然余將遵以前趨銘閣曰是道也雖平闊易行然而迂甚不若村北之小徑捷且便也雪樵亦以爲然遂相携北行至山口兩崖對峙中間約丈餘瓦礫磚石猶有存者蓋山中出入之門戶也於是攀蘿登石以進徑曲折如羊腸上下崎嶇欲顛躓者再三賴銘閣雪樵二君扶持得不仆紆行數十武至其西巔則見四山環抱中有草地約百餘畝白馬嘶晴青牛臥暖誠該村最好一牧場也山之上縱橫數十步荒煙蔓草中彷彿見宮殿舊址少憩由西轉而東其地較廣於西而柞木叢翠迴互作環形銘閣告余曰此古榴城也當年軼事缺無可考今用此地養山蠶故徧植柞樹採葉以爲飼料焉耳徘徊久之盡興欲返余慮山行竭蹶仍願從大路歸銘閣辭以事循來徑先去獨雪樵與余自大路返校歷兩時許始至銘閣已坐待良久矣因顧余而笑曰迂哉子之泥守正路也夫人之步履捷足者先得子不欲速所至則行不由徑可也如欲速所至安能不別趨捷徑而但步康莊乎迂哉子之泥守正路也翌日余西還

後聞六月間大雨山水陡下曲徑多被冲刷惟村東之正路則依然無恙云

蓮渚記

陳孟乾

舊志開原八景中有所謂蓮渚薰風者註云在邑東尙陽堡余幼時就傅城中邦人士有以蓮渚見訪者輒茫然無以應也及歸詢諸故老其爲吾父行者咸曰向嘗耳聞而未嘗目覩其爲吾祖行者咸曰曾見其葉而未見其華焉蓋蓮渚之湮也久矣去年夏雨澤霑足去村東二里許渚水復滿突現新蓮鄉人走以告余急往觀之則見菱芰盈塘菖蒲夾岸蓮葉亭亭浮出水面乃無何由葉而蕊又無何由蕊而花已掩映於池中矣鮮艷奪目清香襲人遠近觀者絡繹於道余亦幸日長無事昕夕顧臨夫物以少而貴事以希而珍耳當此數朶臨風一朝出水逢如故友樂比還珠方之東坡有荷花之詠茂叔著愛蓮之說其欣賞之情殆或過之或曰相傳斯渚之蓮花萼肥大異於他處或又曰蓮藕逾時則腐茲乃重開者何耶余聞之笑而不答今年春本邑重修縣志余以友人之召從事其間偶談斯事

衆咸稱異因言零陵乳穴待人而復醴泉芝草應運而生意者此花有靈埋沒數十年預知將纂志書故挺然特出一雪此有名無實之恥□ 耶否耶爰書之以質諸蓮民國六年五月記

上開原縣陶公霖甫條陳

郭裕齡

爲擬籌經費抽款歸公懇祈酌核指示事竊以辦理新政需款甚鉅因噎廢食規避者多^生不揣冒昧僅就管見所及因民之利以利民者擬舉三條附單呈閱似能裕款防奸息訟安民上下交受其益未識曾否有當仰祈酌核可否批示准行抑或詳請督憲以定取舍^生非好事伏思食毛踐土具有天良際此多難時代凡屬國民有一分心力即宜盡一分心力况^生家被恩五世尤當盡言無隱即所擬各條掛漏實多仍懇翦裁以資補助所謂善政得民財者此也再能上下一心和衷共濟富强之望易如反掌矣除將籌辦新政各緣由具稟上陳外另繕摺附後此稟 父台案下恩准指示施行

光緒三十一年十一月呈

一曰墾閒荒所以化私歸公也請將屬界村屯無主閒荒無論已經被人私墾或尙未經開墾凡查無文契可憑者在某村界內即准某村公會計畝報領屬章納賦免徵荒價庶上裕國課下阜民財非特有款可辦新政即私霸互爭之訟亦可以弭

一曰設保貸所以益富濟貧也請立保貸局代商民出貸生息或商民自貸宜將借券送局蓋戳該局即照借券註冊存查另發執照至期交局該局在所得利內抽收百分之五以三分歸公以二分作該局公費能設局者設局不便設者即由公會代辦尤爲簡易若然則貧者得借資本以謀生活富者不憂抗騙可多獲利則昧債抗債賴債拖債之訟可以弭

一曰查典契所以防假混真也請示商民嗣後典當房地文契旗歸旗署民歸民署蓋用紅戳照契摘要編號註冊以備查核至回贖時兩主同到報銷即照契載價內抽收百分之五此五分勻作二期接典主於置時交二分五釐出

典主於回贖時交二分五釐如此辦理則假契匿契二契丟契之訟可以弭以上三條均須有四註清冊按月呈報該管上司以便查核至於擇人防弊任能獎功各該經理人等務必認真期收實效然尤有急於此者目前可憂之事日兵雖退各村屯盜賊蠶起綁票捐烤苦不堪言雖令各處遵辦巡警一苦於無人一苦於無械時危勢迫進退維艱更兼城中兵力單微勢難兼顧欲除此患非有勁旅不可若猶視爲緩圖竊恐釀成大患遇有盜賊不易撲滅實於當下地方情形似多不便惟望愛民如子除暴即以安良閭邑商民幸甚

正堂陶批墾務事宜有墾務大臣專辦不必再議保貸紅典二條均屬便民預杜訟端然倡率非易存俟酌核弭盜一節係爲當務之急現已飭令各練長置備快鎗竭力整頓此批

提議整頓鄰近南滿鐵路國民學校案

羅寶書

一理由

查教育一端原爲造就國民之要具故世界各國凡欲鞏固其國基者莫不以國民教育爲前提誠以本國之人民受本國之教育始能知本國之關係爲完全之國民而造成健全之國家理有固然無或易者近查滿鐵會社於沿路附屬地內莫不設有該國之學校於中日兒童兼收並教揆之大同主義該國之設施似亦未可厚非殊不知一國之教育要必視本國之國情爲教民之目的非他國所可代庖而不可使他國有所干預也茲以一介兒童知識未開尙無國家之觀念入學初步即入他國之範圍斯語言文字道德習尙皆以他國爲模範而與本國相隔絕迨至成年而後直不啻一完全之他國人矣倘非及早設法維持勢必日人之學校逐漸擴充我國之幼童漸多收入彼日人以精神之同化暗據我無形領土一朝禍發挽救何及本員有鑒於此擬將我國鄰近附屬地之國民學校力加整頓俾我國幼童不再入日人之學校則國家前途庶其有豸

二辦法

甲 實行強迫

義務教育久頒部令惟以碍於事實奉行者尙屬寥寥宜通令各校凡鄰近附屬地之學齡兒童有不入學校及甘入日人學校者均實行罪及其父兄並迫令該兒童務必入本國鄰近附屬地之學校

乙 優加獎勵

家世寒微恒爲就學之障礙實物獎勵每能鼓舞其歡心宜通令各縣凡鄰近附屬地之國民學校於就學兒童一律免除學費並由各該縣勸學所發給的欸令各該校按照學童試驗等級每次分別給獎以資誘導

丙 模範教科

地屬雜居日語頓爲需要直觀教授實物最增興味教育部令原有酌量地方情形於高等小學添授日語之規定國民學校雖非高等然地域旣屬特

別則部令亦可呈請變通至如標本儀器凡附屬地內日人學校所有者我國鄰近該處之學校更多未曾設備比較參觀頓分優劣愚民之甘願入日人學校者亦勢也宜通令各縣凡我國該處之國民學校均應呈請咨部變通部令一律添授日語並於標本等項完全購置庶不致以教科不完之故爲就學者所藉口

以上所陳爲本員管見所及謹按省議會暫行法第二十五條提出議案是否有當尙祈

公決

雙樓
神拳記

羅寶書

事爲千百世所特出理爲億萬年所罕有熙熙攘攘者方且尊爲神而奉承之不懈即吾儕讀書守正亦莫敢置是非口歲庚子余於四月杪適邑西法庫門夜宿雙樓臺遇同逆旅者二人爲山左之客於蒙古者據案酌飲且談語斤斤可聽

但莫辨其爲何說逆旅主人及夫傭輩皆立聽若癡更餘伊二人吸鴉片余前揖與語且訊所言其一曰子亦知吾鄉有聖府乎余曰唯唯否否願領教曰吾鄉患洋人爲害羣請於今衍聖公公命於南山深處覓一隻問焉鄉人往果遇因白所請叟授以法令歸習其法令十餘齡童戟指禹步作法誦咒神即附焉其來狂呼所稱名類古名將义手踴躍作天魔夜义舞遂洋人若犬羊手代刃臂一揮頭豁然落焚教堂火以扇鄰雖茅茨不延洋人見之奔貨財輜重相委棄於路數十里不絕由此逐夷孽遠去君民安業而吾儕辛際昇平於吠吠餘間携酒一斗豚蹄飯一盂據石藉草相與話桑麻樂事作羲皇上人至戍馬干戈事舉無聞焉未必非此輩力是宜謝天感聖而與於其事者吾儕亦宜書諱圖象以祀余諾而退置不怪時無所見比五月旋里後於五里堡見有楊姓童演此者其人面南向疊指四而伸一以揖口翕闢有詞似歌又似祝間雜以里卷俚謠旣而目瞑若偶漸無聲忽仆若屍口耳鼻手足無少動息微續久之漸屈一足俄漸舉一手繼乃手

舞足蹈忽暴起距躍若狂足去地尺有咫語呼名手索刃目鈴口盆腹鼓面紙灰而氣雷吼汗零雨而首飛蓬婆娑作諸態既盡乃退其既成隸軍籍者氣益揚其飾腰首巾率紅黃髮雙髻垂耳際不騎而步持白刃一如霜及對壘雖劍戟林立者無敢當刃腹受不血礮身著若煙突陣迅如登雲霧不傷一卒獲洋首無算入鄉索教匪鄉人迎之恭旗於門酒於尊香於路燒巨燭二粗於臂鄉之人首於墻目於隙舉屏息無敢聲耳相語兒啼怒以目無歧志無惰容神問答若響奉教者膝行哀免手於橐出巨金乞蟻命無少隱作釀爲贖者不勝數人家蓄洋物咸拋棄不少留俄果去數月不見野人皆欣然慶余曰噫是爲何兆乎易曰聖人以神道設教此果其實乎哉余既無所證而信亦莫得叩諸人而索其眞筆爲記以志吾生之奇遇

詩

七古

滴溜石

知縣 姪 色

關門山北嶺巒岌奇峯高出雲漢上怪石縱橫起烟嵐虬松古木盤霄壤豈是巨靈擘岡巒側卧圓石約數丈斜倚巖巔墜欲推山精虎豹畏若盪不知特立幾千秋野老居民羣玩賞一人撼之欲動搖百夫相拒失憑仗疑從靈鷲早飛來遙鎮河伯龍岡象詎知天意善乘除神工鬼斧曲安放土人怪其類提携命名髣髴滴溜樣

滴溜石歌

舉人 傅得宜

硤硤險僻關門山上有絕崖下有川塊石橫巖危若墜經年萬古憑風吹不聞神工鬼斧裁何爲層疊勢欲開多搖不動少搖動徒惹愚氓相聚訟旋轉乾坤生氣通脈連根斷義靡窮似抛支磯銀漢表恍同橋駕秦王嶋轟轟峯頭一片雲滴滴未許埋塵氛清白孰如此仙君嗚呼清白孰如此仙君

垂珠洞

知縣 德克精額

上清河陽象牙山西望龍岡百餘里中有古洞極幽深由來莫能窮其底洞口石
几有仙碁碁罅井井并碁子樵夫疑是爛柯山遙見二叟居其裏携斧奔走亟尋
踪迷却仙踪嘆無已吁嗟乎武陵漁父歸何處洞口桃花猶在邇白雲片片起封
中化鶴無語成逝水芻蕘偶戲未必真仙靈信有豈無以至今垂珠洞中石宛然
洵足載青史莫笑野人語齊東自昔傳聞盡如此

榮京兆尹閱城至開恭迎命賦

幹濟

東風料峭暮春天黃龍岡勢壓雄邊冰餘乍消河餘凍桃未見華柳無煙我今宦
遊淳樸地爲貧而仕同硯田公餘蕭寺兀然坐暮鼓晨鐘香火緣豈有文章傾三
峽豈有豪興飲百川生涯墨池消魔障有時謀醉學逃禪牙吏傳呼按部至報云
吾師來旬宣整理冠帶發狂喜敝車羸馬類乘船南村迎拜望顏色頓覺茅塞澄
重淵握手叙別陞珠玉挑燈話餘索詩箋撚斷微鬚忘近作惟答囊中剩酒錢座
上嘉賓環□顧誰識我拙歷有年非欲談諧冒混俗非欲謙退妄乞憐齷鼠飲河

果腹耳敢云古愚肖先賢晨光啓戶正拈韻暖日鳴禽奏管絃折節降臨師戾止
前驅逐隊列寺前相接莞爾只一笑天空海闊察魚鳶鳶飛魚躍具妙道筆可生
花舌吐蓮自昔推敲傳韻事賤子無能望浪仙

西山石壺

訓導 張旭

松山堡外彩雲濃貨郎屯前開綺陌遙望象巖高層層何物龐然西溝隔想是五
老會蓬萊醜醜醉倒神仙宅遺落玉壺到凡間至今亭亭化爲石不然形體何太
全蓋上時見祥烟濃風雨應期來蓋內噴雲口敷澤涓涓不斷若江河滴滴歸源
冰心格通天澈地聖有靈太和網緼氣一脈箇中日月小有天霽後尊然任指
摘

西山石壺歌

拔貢 張縉

曾見西溝巨石墩上綴蒼苔似綠罇東臨象岫承天恩牙笏北連灝氣吞醜醜
釀沒朝昏聳峙盍盍近覆盆抑誰晏罷九華門故擲尊彝峭壁存高貯瓊漿沉瀼

溫牽牛夜飲會天孫霎時蓋頂白雲屯口滴清涓潤山根倏忽風雷雨直噴陰陽
變幻助乾坤天笑玉女舌難捫乍散投壺電爍痕

朝陽寺

邑進士 郝 璞

梅家寨後接崇山峯巒疊起如仙洞山凹宕出五層坡瓦礫成堆無可控朝陽寺
在四層中內有古井圓似甕井深數丈水清寒凜冽三峽相伯仲羣峯夾寺水潺
湲汀淙一似笙簧弄□梨桃杏密森陰野鳥山禽相喧哄有欲覺時聞晨鐘陡然
喚醒幽人夢長嘯一聲豁心神空谷足音如鳴鳳

臥龍潭

知縣 燕 都

尙陽堡外東南路孤峯嶙峋插雲霧屏開青翠映寒潭峯頭瀑布懸如注勢同渴
鹿奔潭心潭底臥龍威而怒淵深莫測驪珠宮似有山靈相呵護海神廟塑山之
巔對聯顯赫神威露陰晴恰自禱祝來家人父子渾如晤士人淳樸賴神靈神靈
亦自憐呼籲

五莊觀

知縣 德 福

官糧窖左東南山古道曲盤逼霄漢殿宇閑闕道院深匾額高懸五莊觀層巒羅
列擁飛泉一縷銀光珠五貫澎湃直瀉在巖巔名山瀑布真堪冠臨流節取一勺
多味甘如飴茶鐺畔排闥一望絕塵凡心目豁然如冰炭清淨無爲仰彌高誕登
何時到彼岸

純眞和尚

訓導 丁龍章

醫閭山後出高僧住持普安迎水寺不知面壁幾多年跳入火劫烈焰避廟宇依
然另開山移建龍泉鋪金地十笏不聞佛號煩避人入定心無二忽聞醫好紅沙
女棒喝山精與孤媚何須驅鬼役神靈但聞俚言僅十字心邪招邪病根源心正
邪滅通醫意去罷二字本何經識定力定眞智慧不枉法號諱純眞天龍一指毫
無僞數年門徒聚實繁玉皇閣內去安置涅槃三世了生前暫把周身皮囊棄永
平道上遇有緣聊把歸西隱語寄君不見龍泉寺裏繪眞容至今宛爾如游戲

神拳歌

趙薌生

雲愁慘風怒號云是精兵下天曹額繫紅黃巾兩色復又腰間勒作縑蓬蓬散髮垂過耳婆娑跳舞如升猱猱醜怪吁可畏見之懍懍寒生毛楚人一炬尤可怕絕好樓院付焦熬聞說津沽初舉事曾助官軍立功勞上陣不用鎗與礮草木入手皆成刀敵人鉛彈飛如雨及身曾不損分毫騰身闖入敵軍去煙火愈烈興愈高逢人殺人馬殺馬血肉須與湧波濤妙法更有紅燈照仙風搖曳凌空翱火輪鐵甲任無算官教片板化爲膏此術神奇世罕有從古恐亦未經遭想是本朝深仁厚澤二百載特遣普天率土出英豪不領司農餉不穿戰士袍自集兵百萬遍地逐腥臊符言祇念五七句兵法何須龍虎韜君試思蚤尤阪泉戰黃帝太公牧野秉白旄不知當年費了多少英雄氣豈若此赤手屠鯨又釣鰲惟有小儒性愚戇幾回輾轉首頻搔開闢至今無此局豈真世變隨滔滔致使三軍同兒戲坐令列國生喧囂一朝笑柄那足惜千載史論誰能逃切莫管飲香醪

九日偕趙比部幼樵游黃龍岡

民國二年陰歷九月九日

新劉煥書

子丹時權開原權政

黃龍岡上秋風涼黃龍岡下秋草黃新雨洗却俗塵淨西風吹送野花香我偕趙君適來游吟哦緩步信徜徉平時不諳腰腳健到此始知筋力强初上峯頂極目望環山村落杳微茫一城臨水如斗大一塔孤立臺中央纔過山腰又山腳拱木參差森幾行不知下爲誰氏墓樵牧呼嘯狐狸藏峯迴路轉百餘步道逢兩叟話農桑一叟自言七六一叟六十面微蒼相看野火沿山燒枯榛敗棘天荒荒未幾移坐最高峯白衣送酒走踉蹌席地借草足斟酌陶然醉倒菊花觴暗中仙人齊拍手此地幾見公等狂郎中傾琖疑翻河清泉挹注酒如漿須臾大醉下山去野人殷勤愧莫當我欲少留僕夫催鳴鞭一指出山莊車聲磷磷入城來回看暮靄落平岡

次子丹游黃龍岡原韻

趙薌生

西風颯颯天氣涼東籬未綻菊花黃既乏秋英助詩興又無白衣送酒發奇香君

輩出游我未往城市散步足徜徉人生行止各異趣由來萬事豈能強無端忽起風雲感中原四顧殊蒼茫側聞正式開政府提議全權集中央羣賢彙進拔連茹萬民納軌順周行我國疆域四萬里地大物博無盡藏鑛產頗堪資工藝土田充足富農桑天然豐阜偏貧弱搔首直欲問穹蒼帝制而今變民主四千年事破天荒明朝總統宣受職中外慶賀趨踉蹌我屬國民一分子遙遙亦應晉一觴滿引巨觥呼萬歲自謂喜極元非狂但願年年重九節大車常泛酒如漿菲材於世了無補大局自有偉人當從此太平供租稅衡門戢影卧山莊與君預約明年會不辭大醉黃龍岡

七律

朝霞擁塔

知縣 趙允昌

遙望浮屠插碧空晴霞擁護倍玲瓏層層寶鏡朝含彩面面風鈴曉映紅影射曦暉數里外光凝烟火萬家中傳言舍利深藏處猶見禪師妙用洪

清河夜月

典史 周 浩

獨上城樓望渺茫山連夜月晚蒼蒼仰觀皓魄憐孤影俯瞰澄波入大荒流水無心留宿漲白雲有意映晴光故園多少登臨處遙指疎星思更長

蓮渚春寒

知縣 王克家

橫塘千畝水清淪無限冰荷不染塵花對邊城炎亦冷渚臨牧野夏如春淡粧非爲含香異素質偏宜解語真猶愛初秋寒露滴蓮房墜粉一何新

因公之松山過伊尙書祖墓偶作

知縣 明 亮

攀龍附鳳毓動奇鏡水環山太宰基國戚豐碑光日月名臣盛蹟入歌詩佳城鬱鬱堪千古風木森森擅一時開邑楸林瑩不少誰將遺烈動謳思

金線河灣

知縣 萬如濟

金線河西出水關招提門外任回環春風好鳥啼深樹夏日遊人醉淺灣萬縷垂絲青細細一條宗派碧潺潺時聞遊客歌堤畔檀板輕敲釣渚間

飛來仙石

知縣 蘇爲正

競言古剝墜仙石何處飛來耐所思鍊補疑從天上落鞭驅或向海中移談經點額非無以悟道成羊信有之體秀機圓那得似西湖靈鷲一同奇

乙未小陽月過伊尙書基夜宿松雲寺偶題

知縣 沐翰

誰言舊跡落荒烟占盡扶餘一洞天兩面青峯朝象岫中間翠澗引龍泉千年風水歸先墓萬代林坵對古禪最是巖前笏版象於今猶喜土人傳

蓮渚薰風

生員 周維墉

田田蓮葉引薰風夏日花開遠渚中溽暑消時搖蓋翠淤泥淨處澣衣紅竹修塘北芳堪挹琴撫池南曲未終香氣飄來遊客醉筒杯全是碧烟籠

線河煙柳

周鐘

古剝河灣起瑞煙紋成金線柳條牽鶯梭織去絲千縷燕剪裁來水一川綠繞橋

頭常漠漠青縈波面自涓涓風吹縐隨流細黛染春溪兩後天

榴城簇錦

恩貢 王思明

望中爛漫渺無垠踏徧芳城榴色新翠萼遙分邊塞豔朱華不讓洛陽春漫誇織錦鶯梭巧且喜裁紅燕剪頻南枕清河聽滾滾携筇應是看花人

清河夜月

增生 王思禮

清河環繞古城法萬里荒煙接素秋兩岸淡籠漁父火一輪低壓客人舟波連銀漢珊珊玉光射龍宮滾滾毬惆悵鬢翁何處所至今水月問誰遊

線河煙柳

舉人 姚桐

河流一線碧無邊弱柳低垂兩岸煙錦浪分開新絮落炊痕鎖住小琴眠腰籠薄靄逢人折眼展清波送客圓到此移情詩境遠雨餘風定早春天

蓮渚薰風

前人

香蓮滿渚淺深同別樣花開別樣紅直出波頭迎曉日斜從水面盪薰風當樓一

曲琴調後隔岸千竿竹引中漫道淤泥能染得丹心不改仰天工

花露臺

生員 李敬先

萬紫千紅畫景開香生驛路有高臺兩姻鬪富爭花露四境觀光踏草來未置黃
金招國士忙陳白玉隔鄰媒雲橫故址餘殘照孰若登春徧九垓

松山象笏

生員 韓鎮三

重巒卓立插雲間疊疊松林疊疊巒象笏排空擎碧落虬枝滿樹鎖深山朝天片
石龍鱗護近日層巔塵尾環如此蓬萊開勝境巖頭昂欲列鸞班

清河夜月

武生 武光斗 山西太谷

也曾折宕也曾流河月雙清趁夜遊句咏瀏其還渡口聲消款乃靜灘頭紋移水
面知平穩影到波心任去留爽氣宜人看不厭貪眠豈肯學沙鷗

清河夜月

段雲峯

河水洋洋月一輪關門緊閉散閒人文章到此方知岸晝夜如斯莫問津玉練塵

消空色相銀蟾光射淡星辰沙鷗難解其中趣任爾貪眠古渡濱

清河夜月

縣丞 劉興邦

水繞城垣夜已幽更兼皓月恰當頭星移數點光微映堞入中流影倒收岸隔漁
燈時隱約奩開寶鏡任沉浮清華不讓松風趣勝似良霄秉燭遊

贈管際翁先生

李芝雲

洗心堂上笑言親同作芸窗誦讀人每恨鴻泥分踏雪又欣鴿硯共磨春情深詩
酒緣投契交訂琴書亦夙因結伴與君曾有素蘭之氣味竹之筠

春日郊行

山南山北路迢迢無限春光似畫描燕翦裁紅桃帶笑鶯校織綠柳含嬌鳥鳴坐
聽宜中谷人語偕歸過短橋道是郊原風景好杏花村畔酒帘挑

秋日偶成

倏忽西風又一年秋來到處換雲烟澄鮮碧流無極明淨青山住有緣斷續砧聲

水

村樹裏蕭疎柳色夕陽邊人間添得幽閒景鴻雁飛時字滿天

何鐵生太史工詩善畫奏疏皆中肯綮出守揚州卒於任因

爲詩弔之

良弼

聞道循聲汲黯尊揚州夢覺脫塵根才名久已超蓬島讜論偏能壓諫垣萬樹官梅留畫本二分明月弔詩魂遙知廿四橋邊路無數甘棠灑淚痕

古意

流年似水負良辰獨守蘭閨又幾春錦字雖裁空寄恨金錢欲卜總傷神花開添得腮邊淚鳥語驚回夢裏人愁倚翠樓欄畔望塞垣何日靖征塵

九日與農曹同寅讌集龍爪槐偶成

潦倒金臺已半生登臨猶復意縱橫避災恍入華胥境酌酒權同栗里情兩本疏槐銜夕照一塘敗葦戰秋聲座中都是龍山客司馬英風待品評

延松巖同年由奉天學差報滿入都旋授西藏辦事大臣

予爲錢別並贈以詩

三載皇華甫罷吟班超事業奮如今曾持玉尺鴻才聚又挽金戈豹略深萬里長風名士志一杯別酒故人心甘棠定植西陲遍不數當年祇樹林

奉使茂明安賜奠

平明展駕響銅鈴爲賦皇華不敢停數騎衝開邊草綠萬山環送使車青才非異等慚西漢身奉恩綸到北庭幸喜未同班定遠玉關重入髮星星

遣懷

趙蕪生

浮沉斯世久忘機魚我安知是也非鏡裏休嗟雙鬢短眼前漸覺故人稀情懷落寞憑詩遣氣味酸醎與俗違抗論何關天下計盤殮且療腐儒飢

冬夜索句

瘦聳玉縷寒不寐夜闌爐火剩微紅偷來格律殊難愜撚斷髭鬚總未工幾輩探驪誇手妙是誰夢鹿想情同從今莫漫枯腸索會許靈犀一點通

秋城晚眺

西風策策拂衣涼，獨上城樓思渺茫。
數點征鴻來絕塞，幾家打稻趁斜陽。
雲低孤塔添虛白，煙斷遙山入暮蒼。
最是兵戎勞將帥，不堪荼毒憶南方。

丙辰元旦感事

蒼狗白雲爭變幻，年來影事鏡中花。
籌安不惜羣兒誤，著局應防一子差。
民意演成新帝國，皇恩覃及大官家。
草茅擬上河清頌，六十衰翁鬢已華。

九日登雙樓臺

朱衣點星閣

柳條邊內矗樓臺，九日登臨眼界開。
四面雲山遙拱向，一灣遼水近縈回。
避災自昔嗤迷信，作賦於今愧乏才。
且欲搜尋誰建築，摩娑片石費疑猜。

其二

不風不雨過重陽，爭上樓臺擴眼光。
邊柳有情隨我綠，野花無主爲誰黃。
萬家煙火資縈拂，四面雲山接渺茫。
細認宣威題額字，問他幾度閱滄桑。

秋夜書懷

移寓後作

王毓琪

檢書終日眼光迷，傍晚偷閑步院西。
風急不容雲意懶，樹高翻覺月輪低。
小庭花影當窗動，涼夜鷄聲入夢啼。
莫道儂無東道主，有人願借一枝棲。

因日軍駐宿有感而作

塵滿河梁水滿池，連朝士卒渡遲遲。
江邨風起旌旗舞，野徑人稀戰馬嘶。
已去征車頻往返，無情芳草尙迷離。
鄉愚且莫愁兵燹，此是興亡起點時。

其二

日俄到處盡烽煙，全亞風雲色慘然。
政詔外交空有約，國稱中立恨無權。
氣盈未必逢三鼓，軍練還應備十年。
寄語同胞宜自振，乘時奮起莫遷延。

其三

家室流離鄉復城，一番烽火一番驚。
田園被澤空春雨，草木含煙尙午晴。
千里羽書通遠電，萬村耳目聳行旌。
無端更助詩人恨，最是東風太不情。

初應聘爲館師

十載程門瞬眼過初傳衣鉢步西河授徒始悟師恩重獨處方知友益多妄羨鷗
鵬鞭棧馬愛培桃李施松蘿牀頭一劍頻磨礪未識鋒鋩竟若何

夜雨寄宿山莊

晚雲送我到山莊倉猝停車擇不遑下榻但求棲處穩寄書翻笑客中忙風傳蟲
響經宵苦雨雜鷄聲入夜涼一枕沉沉清睡熟那知既白在東方

書懷

趙家幹

自問歸田是也非平心思索闔雙扉欲操舟楫波濤惡願獻芻蕘才力微小草在
山無遠志秋鴻鍛羽怯高飛我今已伴漁樵隱那管旁觀毀與誹

寄慨

憶昔秋曹舊有名而今憔悴老邊城青山愛我樵爲侶白眼看他蟻鬥兵虛度半
生呼負負未諳兩字是營營此情擬向何人訴獨對孤燈百感并

章蔭三監督延修縣志書成因賦此以博一笑

拂袖歸田作酒徒名場宦海久模糊誰知蓬戶潛修日又見賢侯枉駕趨台命承
來賜屢索中書老去髮全無惟餘一事堪惆悵幾見人間有董狐

其二

自春徂夏復經秋閱歷三時役始休竊喜同人資贊助每臨一字費研求灾身幸
免鄰崔浩遺穢何曾效魏收借問南昌賢令尹酬勞可賜酒尊不

長夏村居

趙賡雲

閑著芒鞋柳岸西科頭箕踞坐沙隄平林埋網兒羅雀落日倚門婦喚鷄有限韶
光隨水去無心雲影渡山低老農細把陰晴課准擬明朝雨一犁

其二

枯枝拾取半杈枒囑咐廚奴細煮茶偶觸硯池閑滌筆且隨籬曲亂栽花立身不
定風中蜨氣象難平雨後蛙怪底昨宵食指動野蔬來饋自山家

其三

山花夾道裹輕沙，村樹難將望眼遮。
綠草牛羊官牧養，黃茅鷄犬野人家。
遲遲歲月閒中覺，縷縷濕潮雨後加。
畢竟北方風上異，不栽桑葉祇栽麻。

其四

亂書疊疊滿床橫，茶罷詳參物外情。
喜自何來辰鵲噪，刻憑誰報午鷄鳴。
臨風女慣縫香袋，防雨人爭蓋醬棚。
莫道夕陽紅有限，餘霞成綺半天明。

其五

偶因破悶出門行，村叟謙虛解送迎。
令我消魂竹笛曲，引人思睡紡車聲。
野溪潦水蛙分部，薄雨空階蟻鬪兵。
信是老饕有饒福，新嘗東道一杯羹。

其六

卓午斑鳩不斷呼，日斜果送雨如酥。
楊花作態隨風捲，蒲柳生溫當席鋪。
細闌紅絲拴蜨子，笑拋黃豆打鷄雛。
閒中逐逐忙何事，裁罷詩箋弄酒壺。

其七

新麥磨成餅餌蒸，茅檐一縷晚煙騰。
巨猫退步將擒鼠，小雀團飛爲避鷹。
有客偶來爭煖酒，既昏便息不張燈。
田家風味嘗應飽，埋首林泉愧未能。

其八

十二鐘敲午睡餘，村居始覺應酬疎。
入門客或求題扇，隔戶人多聽講書。
不製困籠常玩鳥，縱無清德亦懸魚。
平生苦嗜詩成癖，夢造蘇黃李杜廬。

紙鳶

石節山

綠楊城北畫樓東，百丈游絲曳半空。
一幅畫圖春草碧，滿天羽翼夕陽紅。
飄飄直上青雲裏，站站如臨白水中。
養到木雞功已久，乘槎好會待春風。

老農

菜花畦北稻花村，休將功名富貴論。
籬外鋤花呼弱女，雨前種豆課童孫。
置身恍入桃源界，問姓須從粟里門。
二十年前簞笠苦，至今耄老向誰言。

清河夜月

稻花村北柳隄前
河水洋洋月色鮮
金鏡展開橋外路
明珠點破水中天
照來渡口三更冷
印透波心一顆圓
待到中秋十五夜
家家玩賞更堪憐

七絕

蓮花峯

邑進士 郝璉

採蓮一曲放舟歌
爲愛前賢樂意多
種得滿池生碧翠
好邀明月照清波

龍岡北枕

生員 周煜

乾坤秀氣毓龍岡
橫枕如屏列北方
一帶縈蟠高處臥
風雲變化自潛藏

古塔朝霞

貢生 周維地

寶塔凌空勢最崇
當年建築有神工
每逢曉日初升候
高處霞光別樣紅

磴山積雪

訓導華長卿

朔風吹雪雪初晴
石磴岩堦一望平
粉本寫生添畫稿
心如朗朗玉山行

清河夜月

周鐘

河水澄清一色秋
波心月印夜光浮
遙看兩岸沙明處
唱晚漁翁繫釣舟

仙石雲屏

侑生 王朝柱

古剝荒涼信有靈
三皇驅動六神丁
敬亭昨夜山尖失
故意飛來作石屏

咏古塔

恩貢 王思明

寶塔蒼蒼逼太虛
風霜萬古鎮扶餘
傳聞果否唐人建
未審當年太史書

初冬嶺上早梅

良弼

羅浮一夢證前因
久抱仙才厭俗塵
獨向空山風雪裏
橫斜先釀數枝春

又

冬嶺嶺然幾樹梅
羣芳落盡冒寒開
珊珊瘦影饒風骨
曾受冰霜磨鍊來

初春夜雨曉霽偶成

雲散長空趁曉風
土膏猶溼日初紅
春心醞釀知多少
一夜濛濛細雨中

觀稼軒

平疇颭動綠無窮一片良苗被好風想見聖朝民事重務農深意寓園中
又

軒前種類本分明每被通儒錯喚名惹得老農都絕倒不分五穀是書生

閑居雜詠

趙彥生

懶向親朋作報書閉門生計未全踈小園闢得三弓地半種梨桃半種蔬

其二

雙雙語燕兩無嫌日日銜泥撲畫檐擬向門前栽綠柳恐人怪道似陶潛

其三

厭聞世事久忘機掃榻焚香靜掩扉更築新牆高過丈曉風吹到市聲稀

其四

媯居斜倚綠楊城過客無人識姓名偏是東風殊好事隔牆送出讀書聲

感時

王毓琪

莫將困睡怨東風離恨閒愁總夢中翻是杏花聊解意枝枝減却去年紅

因狂風作

到門方盼日瞳瞳忽訝烟塵滿碧空烏鵲也嫌巢不穩枝頭亂噪罵東風

春日雜咏

李芝雲

書窗隱約接重巒幾陣東風解曉寒牆外杏花堤畔柳春來頻欲引人看

移花偶成

短短踈籬花自栽殷勤灌溉破蒼苔爾時開到芬芳處定爲香風入座來

秋夜偶成

秋雨晴時新月明涼生偶覺客衣輕挑燈靜坐渾無緒天際歸鴻聽一聲

送春

春日遲遲却不遲忽聞歸去在斯時東君若肯還留住又展華箋幾幅詩

其二

春入遙山碧四圍春回桃李減芳菲青神必竟難留住更訂明年須早歸
遊趙家台遇雨

閒步郊原小徑開幽居不遠趙家台何嫌風雨吹人面爲上龍山絕頂來

又遊趙家台

青山一帶接黃龍碧水平流夾岸通柳影暗遮人背綠花光直趁馬蹄紅
書齋有感

兀坐書齋景寂寥窗前明月照深宵挑燈欲寫衷情事夜析聲聲入聽遙

又

欲訴衷懷自解嘲浮雲世事等閒拋書窗近日添新景曉月彎彎挂柳梢

送子丹赴孤山

趙家幹

山有詩人山不孤孤山昔日有林逋君居須向山深處也種梅花三百株

其二

書裝摒擋莫躊躇此去翛然山水居一事敢煩君切記新詩覓就付雙魚

其三

聞說孤山風景殊一峯矗立水平鋪明春我欲尋君去共作煙波兩釣徒

其四

一山一水一東坡逐日登臨任嘯歌不道人間清淨福潢南老叟占麥多

雨餘記事

石節山

桃花如錦草如茵好景偏從雨後新捲却珠簾樓外望一分柳色一分春

賞花

千紅萬紫影離離底是東君不我欺兒女也憐春富貴看花直到晚涼時

吾古

示子弟

良弼

鴻鈞賦形後秉彝具良規漸與至道遠步趨悞多歧由夾方寸地心理無盈虧返本全所受紛紛復何爲

小北河水災

趙賡雲

東南風狂煽舟行捷如箭鼓枻小北河執筆書所見四望水無涯茫茫白一片吁嗟數日前大雨交雷電十日不放晴懍懍驚天變繳水蜿游龍盤空舞石燕莽莽大水來毀壩浸芳甸稻梁濡泥塗黍稷難登薦沿隄有人家濁流漫墻院姥姥念彌陀妻孥哭掩面少女更咽啼啟積藏織絹姊妹抱衣裳妯娌□釵釧牛羊觸籬愁黃犬搖尾戀老者忍痛言餘生逃一綫蒼天活殺人罹災誰慰唁道旁有哭聲聞之心胆顫惜彼父母官琴堂正排晏熊掌與駝峯美酒雜精膳但博長官歡安知小民賤我雖局外人覩此亦愠見勃然拈我毫慨然磨我硯細繪流民圖竊作救荒傳昧死敢上陳封奏通明殿九重沛殊恩賜賑邀天眷放粥命委員散糧派良掾災黎免溝壑望闕歡呼抃吁嗟乎寒儒作大言傷時空側弁

答子丹主政

趙家幹

劉君子丹氏天姿絕穎異目下十行書腹爲五經笥三十成孝廉四十居近侍俄而遷主政罡風忽吹墜今年孟春初來開充委吏稅務既稱平吾鄉同受賜公餘值閑暇飄然隨風至入室即高吟舉觴拚一醉論史闡精微論文探奧邃脫略忘形骸簪纓夷薛荔余詩索粗豪賴君頻指示改竄與批評情親同昆季余性尤頽靡得君勤鼓吹當路馳薦書措詞極恣肆人世方澆薄冷煖視勢利車笠十年盟一朝忽捐棄君獨軼等倫不以貴賤易雖因臭味同良由惻忱摯豪無世俗態如見古行誼此情難言酬斯義終難閱贈君一篇詩二百一十字

排律

聞知議成有感二十八韻

并序

趙薊生

光緒二十六年庚子夏五月義和拳亂民構釁與英法德美俄日義奧八國失和風聞京津於七月間相繼失守兩宮出狩西安閏八月俄人佔據東三省八旗

綠營時皆潰散所過州縣官民逃避一空土匪游兵乘機四起殺燒搶掠慘目驚心幸李傅相仍主和議天下人民賴以稍安然而蹂躪已不堪矣

滿目傷離亂餘生痛不辰中原非小弱列郡任沉淪擄掠兵皆賊逃亡富亦貧哭聲盈道路殺氣薄煙塵虜帥誠無敵華官詎乏人可憐膺爵賞偏忍負君親坐視三軍潰甘貽八國噸險將冠帶族斷送犬羊身雪憤宜圖霸修文在睦鄰平情追首禍肇釁誤拳民戰事同兒戲符言假鬼神妖魔焉有濟崇信果何因憲典援應戮王章貫未伸興戎隨藉口入寇反稽唇厖雜屯津衛猖狂犯帝闈夷情殊叵測野性遽難馴勢逼鴟張甚威加虎視瞋陣雲愁北壓法駕幸西巡宗社維全局安危仗老臣蒼生塗炭極丹詔赦書頻但願干戈息休嫌玉帛陳議和仍仿舊約款恐增新箠食迎如土羈縻館若賓低顏供芻米束手耗金銀都說盟將定荒聞恐失真心猶懸惴惴車尚響麟麟大劫憑天意羣黎戴聖仁明年一樽酒共醉太平春

輓韓生國權二十韻

趙家幹

余去年設國文專修科生即來受業迨中學校添班招考生又來相從兩年師弟情好殷殷詎料天不假年玉樓赴召聞之甚愴余懷因爲此詩聊寄余感初不知字裏行間是字是淚也

自汝從游後居恒見性真憐渠殊瘦弱待我最溫純北校論文日東堂授課辰及時勤奮勉攻業夙艱辛誠篤超流輩襟期尚古人出言常呐呐持己總恂恂抱恙當三月相違僅二旬驚心傳噩耗撒手脫凡塵孤苦拋嫠婦哀號動比鄰舉家齊隕涕同學盡傷神玉樹崇朝萎曇花一現新昔來爲底事今去又何因命薄庸醫誤情長衆弟親蓋棺無子女掩泣有萱椿委化三千界浮生十七春青年翻作古白骨竟成陳隨露身先隕凌雲志未伸追維深痛惜瞻望屢逡巡永夜悲思切蒼穹扣問頻吟詩聊當哭燈下淚沾巾

五律

咏威遠堡小塔山

張天馥

寶塔置山巔尖峯沒半天登高窮八極憑眺藐三邊貞觀平遼日勳臣董匠年遙
遙千載下盛蹟至今傳

蓮渚春寒

訓導 李 試

蓮淨渚塘寬花開錦色攢非秋香亦冷當暑氣猶寒韶秀依然是丰神別樣看共
相傳異事盛夏似春殘

前題

訓導 李如瑞

邊地猶多景誰憐君子花淤泥全不染溽暑定無加爽氣來山岬薰風傍水涯渚
寒春略似紅映夕陽斜

五月四日驚聞家大兄怡軒訃音因爲詩以哭之

別君八越月有夢到京師節屆端陽日書來絕命辭驚駭一家哭闕徧滿城知反
凶帖吁嗟伯氏篋

其二

早知兄西逝深悔弟東旋遼水都成淚玉樓別有天得書撕紙裂扶襯許城穿伯
道竟無子煢煢五十年

其三

昨宵觀列宿驀地墮文星乞命無絲續哭君有涕零孤鴛悲嫂苦斷雁托兄靈薄
官廿一載清風兩袖冷

其四

廿年游宦去三度丁艱來大事雙親葬長天一雁哀兄悲跨白鶴我愧見黃槐披
讀知非集遺編不忍開

弔友人穆毅亭團總陣亡

王毓琪

苦戰出龍岡身亡志未亡義聲昭旭日軍律肅秋霜一滴疆場血千年團保光助
君榮耀意夜月滿祠堂

其二

壯氣冠團保是翁矍鑠哉虎方探穴得人竟倒戈來

傳聞君困賊急鄰邑兵自後擊之仆

邊塞留餘勇祠堂弔將才凶聞飛遠電驚觸舊交哀

暮雨

散步近黃昏濃陰壓短垣電催雷響急雲挾雨聲奔庭鴨洗簷溜池蛙喧郭門料
當芳草徑屐齒印泥痕

送陳楚香廣文致仕歸

趙家幹

吾愛陳夫子空曹耐寂寥簞瓢七載苦行李一肩挑幽悶憑書解閑愁借酒澆驪
歌君去矣千里路迢迢

其二

薄宦京華久歸來始識韓人欣同臭味譜遂訂金蘭聚會無多日消沈歎一官臨
歧何所贈寄語報平安

八景詞

龍岡北枕

張峻德

突起龍岡鍾秀早首尾蜿蜒第一蓬萊鳥疊幃層巒齊合抱環城不隔青驄道向
坎還應箕宿好枕作屏風北護同豐鎬聞說來遊人踏草蒼松樹下烟塵掃

清河夜月

夜半清河開薄霧楊柳堤邊幾個人來渡月出東山光滿樹一聲漁笛蓬窗住浩
淼金波隨岸度萬派西流印徧香輪兔最是團圓三五足挑燈願擬蟾宮賦

古塔朝霞

十二樓頭煙淡繞寺打殘鐘月落新鉤小景向禪關着縹緲崢嶸古塔超雲表五
色霞光烘未了旭日騰輝暖徧扶桑曉廿丈浮圖仙境少凌霄直自赤城標

線河煙柳

遠送清流奔巷口滿徑飛花裊裊堤邊柳慣折柔腰迎客走河中襯出香蓮藕莫
辨橫空橋左右萬縷牽絲鎖住煙痕厚試問眠琴人去否磯頭一個垂竿叟

仙石雲屏

古寺樓臺雄且壯，徧繞深林不比尋常狀。佛殿階前風屢暢，雲籬怪石爲屏障。數丈煙痕層跌宕，早卜甘霖合慰蒼生望。若遇媧皇施力量，神功補就青天上。

蓮渚薰風

解愠薰風來鼓盪，古水山前大地多宏敞。幾度從南添氣爽，吹成小渚新蓮長。恍似虞琴操岸上，一曲絲絃引得清飈響。採去何人橫畫槳，並頭出水丹心仰。

榴城簇錦

獨有高低峯六六，峭壁爲城繚繞芳林木。可作丹青詩畫讀，雲巔湧瀉泉飛瀑。吐滿榴花紅簇簇，戲蝶尋香葉底來。潛伏照到珠明方悅目，舉頭瞥見仙源鹿。

松山象笏

聳秀重巒非綠竹，百尺青松繞住雲生谷。塵尾全從新雨沐，其中景妙堪娛目。象笏朝天山勢肅，四面濃陰圍着虬枝木。陡起濤聲驚野鹿，嶙峋恍上嵩呼祝。

勘 誤 表

四 八	四 六	四 六	四 五	三 八	三 七	三 七	二 二	十 四	十 三	二	一	頁 數	開原縣志正誤表卷六
七	二 二	一 七	一 八	五	十 八	四	四	十	一 七	六	五	行 數	
二 五	二	十	二 七	七	七	十	三	二 十	十 一	三 二	三	字 數	
畔	和	素	來	韓	流	墓	馬	徵	尊	鳩	或	正	
畔	知	索	麥	醇	法	基	焉	徽	奠	鳩	哉	誤	